

阿毗達磨法蘊足論卷第十一

尊者大目乾連造

三藏法師玄奘奉 詔譯

多界品第二十之餘

云何欲界？謂於欲境、諸貪等貪，乃至貪類、貪生，總名欲界。復次：欲貪及欲貪相應受、想行識，並所等起身業語業，不相應行，總名欲界。云何恚界？謂於有情，欲爲損害，乃至現爲過患，總名恚界。復次：瞋恚及瞋恚相應受、想行識，並所等起身業語業，不相應行，總名恚界。云何害界？謂以手、塊、刀、杖等物，隨一苦具，捶打有情，諸損等損、害等、害、瞋恚所起，能起苦事，總名害界。復次：諸害及害相應受、想行識，並所等起身業語業，不相應行，總名害界。云何無欲界？謂於欲界，思惟過患，如是欲界，是不善法，是下賤者信解受持，佛及弟子，賢貴善士，共所呵厭，能爲自害，能爲他害，能爲俱害，能滅智慧，能礙彼類，能障涅槃；受持此法，不生通慧，不引菩提，不證涅槃；如是思惟，發勤

精進，乃至勵意不息，是名無欲界。復次：爲斷欲界，於無欲界，思惟功德，如是無欲界，是善法，是尊勝者信解受持，佛及弟子，賢貴善士，共所欣讚，不爲自害，不爲他害，不爲俱害，增長智慧，不礙彼類，不障涅槃，受持此法，能生通慧，能引菩提，能證涅槃；如是思惟，發勤精進，乃至勵意不息，是名無欲界。復次：思惟欲界，如病如癰，如箭惱害，無常，苦，空，非我，轉動，勞倦，羸篤，是失壞法，迅速不停，衰朽非恆，不可保信，是變壞法，如是思惟，發勤精進，是名無欲界。復次：爲斷欲界，思惟彼滅是滅，是離，思惟彼道是道，是出；如是思惟，發勤精進，乃是勵意不息，是名無欲界。復次：若思惟捨心定，及道捨心定相應，並無想定滅定擇滅，如是思惟，發勤精進，乃至勵意不息，是名無欲界。復次：無欲及無欲相應受想行識，並所發起身業語業，不相應行，總名無欲界。云何無恚界？謂於恚界，思惟過患，如是恚界，是不善法，乃至不證涅槃；如是思惟，發勤精進，乃至勵意不息，是名無恚界。復次：爲斷恚界，於無恚界，思惟功德，如是無恚界，是善法，乃至能證涅槃；如是思惟，發勤精進，乃至勵意不息，是名無恚界。復次：思惟恚界，如病如癰，乃至是變壞法，如是思惟，發勤精進，是名無恚界。復次：爲斷害界，思惟過患，如是害界，是不善法，乃至不證涅槃；如是思惟，發勤精進，乃至勵意不息，是名無害界。復次：爲斷害界，於無害界，思惟功德，如是不善法，乃至能證涅槃；如是思惟，發勤精進，乃至勵意不息，是名無害界。復次：爲斷害界，如病如癰，乃至是變壞法，如是思惟，發勤精進，是名無害界。復次：爲斷害界，思惟彼滅是滅，是離，思惟彼道是道，是出；如是思惟，發勤精進，乃至勵意不息，是名無害界。復次：若思惟悲心定，及道悲心定相應，如是思惟，發勤精進，乃至勵意不息，是名無害界。復次：無害及無害相應受想行識，並所等起身業語業，不相應行，總名無害界。

彼滅是滅，是離，思惟彼道是道，是出；如是思惟，發勤精進，乃至勵意不息，是名無恚界。復次：若思惟慈心定，及道慈心定相應，如是思惟，發勤精進，乃至勵意不息，是名無恚界。復次：無恚及無恚相應受想行識，並所等起身業語業，不相應行，總名無恚界。云何無害界？謂於害界，思惟過患，如是害界，是不善法，乃至不證涅槃；如是思惟，發勤精進，乃至勵意不息，是名無害界。復次：爲斷害界，於無害界，思惟功德，如是不善法，乃至能證涅槃；如是思惟，發勤精進，乃至勵意不息，是名無害界。復次：爲斷害界，如病如癰，乃至是變壞法，如是思惟，發勤精進，是名無害界。復次：爲斷害界，思惟彼滅是滅，是離，思惟彼道是道，是出；如是思惟，發勤精進，乃至勵意不息，是名無害界。復次：若思惟悲心定，及道悲心定相應，如是思惟，發勤精進，乃至勵意不息，是名無害界。復次：無害及無害相應受想行識，並所等起身業語業，不相應行，總名無害界。

云何樂界？謂順樂觸，所起身樂，心樂，平等受，受所攝，是名樂界。復次：修第三靜慮，順樂受觸，所起心樂，平等受，受所攝，是名樂界。云何苦界？謂順苦觸，所起身苦，不平等

受，受所攝，是名苦界。云何喜界？謂順喜觸，所起心喜平等受，受所攝，是名喜界。復次：修初二靜慮，順喜觸，所起心喜平等受，受所攝，是名喜界。云何憂界？謂順憂觸，所起心憂不平等受，受所攝，是名憂界。云何捨界？謂順捨觸，所起身捨、心捨、非平等、非不平等受，受所攝，是名捨界。復次：修未至定靜慮中間第四靜慮，及無色定，順不苦不樂觸，所起心捨、非平等、非不平等受，受所攝，是名捨界。

云何無明界？謂三界無知，是名無明界。

云何受界？謂六受身，即眼觸所生受，乃至意觸所生受，是名受界。云何想界？謂六想身，即眼觸所生想，乃至意觸所生想，是名想界。云何行界？謂六思身，即眼觸所生思，乃至意觸所生思，是名行界。云何識界？謂六識身，即眼識乃至意識，是名識界。

云何欲界？謂有諸法，欲貪隨增，是名欲界。復次：欲界繫十八界、十二處、五蘊，是名欲界。復次：下從無間地獄，上至他化自在天，於中所有色受想行識，是名欲界。云何色界？謂有諸法，色貪隨增，是名色界。復次：色界繫十四界、十處、五蘊，是名色界。復次：下從梵衆天，上至色究竟天，於中所有色受想行識，是名色界。云何無色界？謂有諸法，

無色貪隨增，是名無色界。復次：無色界繫三界、二處、四蘊，是名無色界。復次：如欲色界，處定建立，不相雜亂，非無色界有如是事，然依定生勝劣差別，建立上下，下從空無邊處，上至非想非非想處，於中所有受想行識，是名無色界。云何色界？謂欲色界。總名色界。云何無色界？謂四無色，是名無色界。云何滅界？謂擇滅、非擇滅，是名滅界。復次：諸有色法，總名色界，除擇滅、非擇滅，餘無色法，是名無色界，擇滅、非擇滅，是名滅界。云何過去界？謂過去五蘊，是名過去界。云何未來界？謂未來五蘊，是名未來界。云何現在界？謂現在五蘊，是名現在界。云何劣界？謂不善、有覆無記法，是名劣界。云何中界？謂有漏善及無覆無記法，是名中界。云何妙界？謂無漏善法，是名妙界。云何善界？謂善身語業、心心所法，不相应行，及擇滅，是名善界。云何不善界？謂不善身語業、心心所法，不相应行，是名不善界。云何無記界？謂無記色、心心所法，不相应行，及虛空、非擇滅，是名無記界。云何學界？謂學五蘊，是名學界。云何無學界？謂無學五蘊，是名無學界。云何非學非無學界？謂有漏五蘊，及虛空、擇滅、非擇滅，是名非學非無學界。

云何有漏界？謂有漏五蘊，是名有漏界。云何無漏界？謂無漏五蘊及虛空擇滅，非擇滅，是名無漏界。云何有爲界？謂五蘊，是名有爲界。云何無爲界？謂虛空及二滅，是名無爲界。嗚挖南曰：

界有六十二，十八界爲初，三六一四種，六三兩種二。

緣起品第二十一之一

一時薄伽梵，在室羅筏，住逝多林，給孤獨園。爾時世尊，告苾芻衆：吾當爲汝，宣說緣起。緣已生法，汝應諦聽！極善作意。云何緣起？謂依此有，彼有；此生，故彼生，謂無明、緣行、緣識、緣名色、名色、緣六處、六處、緣觸、觸、緣受、受、緣愛、愛、緣取、取、緣有、有、緣生、生、緣老死、發生愁歎、苦憂擾惱，如是便集純大苦蘊。苾芻當知！生、緣老死，若佛出世，若不出世，如是緣起法住法界，一切如來，自然通達，等覺宣說，施設建立，分別開示，令其顯了，謂生、緣老死，如是乃至無明、緣行、應知亦爾。此中所有法性、法定、法理、法趣，是真、是實，是諦，是如，非妄、非虛、非倒、非異，是名緣起。云何名爲緣已生法？謂無明、行、識、名色、六處、觸、受、愛、取、有、生、老死，如是名爲緣已生法。苾芻當知！老死是無常，是

有爲，是所造作，是緣已生，盡法、沒法、離法、滅法；生、有、取、愛、受、觸、六處、名色、識、行、無明、亦爾。苾芻當知！我諸多聞賢聖弟子，於此緣起，緣已生法，能以正慧，如實善見，善知、善了，善思惟，善通達，不依前際而起愚惑，謂我於過去世，爲曾有、非有，何等我曾有？云何我曾有？不依後際而起愚惑，謂我於未來世，爲當有、非有，何等我當有？云何我當有？亦不依內而起愚惑，謂何等是我此我？云何我誰所有？我當有誰？今此有情，從何而來？於此處沒，當住何所？彼如是知，如是見故，所有世間，各別見趣，謂我論相，應有情論相，應命者論相，應吉凶論相，應瑩飾防護，執爲己有，有苦有礙，有災有熱；彼於爾時，得斷遍知，如斷樹根，及多羅頂，無復勢力，後永不生。所以者何？謂我多聞賢聖弟子，於此緣起，緣已生法，能以正慧，如實善見，善知、善了，善思惟，善通達故。時諸苾芻，歡喜敬受。

此中緣起，緣已生法，其體雖一，而義有異。謂或有緣起，非緣已生法；或有緣已生法，非緣起；或有緣起，亦緣已生法；或有非緣起，亦非緣已生法。或有緣起，非緣已生法者，無也。或有緣已生法，非緣起者，謂無明、行、識、名色、六處、觸、受、愛、取、有、生、老死。或有

緣起，亦緣已生法者，謂生定能生於老死，如是生支，定能爲緣，是緣起性，及緣已生前性，如有取、愛、受、觸、六處、名色、識、行，無明，應知亦爾。非緣起，非緣已生法者，謂除法相。又生緣老死者，謂此生支，雖異生異滅，而緣起理，恆時決定。若過去生，非老死緣者，應未來生，亦非老死緣；若未來生，非老死緣者，應過去生，亦非老死緣。若過去生，非老死緣者，應現在生，亦非老死緣；若現在生，非老死緣者，應過去生，亦非老死緣。若未來生，非老死緣者，應現在生，亦非老死緣；若現在生，非老死緣者，應未來生，亦非老死緣。若佛出世時生，非老死緣者，應佛不出世時生，亦非老死緣；若佛不出世時生，非老死緣者，應佛出世時生，亦非老死緣。若緣起理，有顛倒者，應成二分，不決定故。應可破壞，理雜亂故。若爾，不應施設緣起，佛不應說生緣老死，然佛所說生緣老死，理趣決定，去來今世，有佛無佛，曾無改轉，法性恆然，不隱、不沒、不傾、不動，其理湛然！前聖後聖，同所遊履，是真是實，是諦是如，非妄、非虛、非倒、非異，是故佛說生緣老死，如有取、愛、受、觸、六處、名色、識、行，無明，緣行亦爾。

復次，無明緣行者，云何無明？謂於前際無知，後際無知，前後際無知；於內無知，外無知，內外無知；於業無知，異熟無知，業異熟無知；於善作業無知，惡作業無知，善惡作業無知；於因無知，因所生法無知；於佛法、僧無知，於苦、集、滅、道無知；於善、不善法無知，於有罪、無罪法無知，於應修、不應修法無知；於下劣、勝妙法無知，於黑白法無知，於有敵對法無知，於緣生無知，於六觸處如實無知。如是無知，無見，非現觀，黑闇愚癡，無明盲冥，罽網纏裹，頑駘渾濁，障蓋發盲，發無明，發無智，發劣慧，障礙善品，令不涅槃；無明漏，無明瀑流，無明軛，無明毒根，無明毒莖，無明毒枝，無明毒葉，無明毒花，無明毒果，癡、等癡、極癡、欣、等欣、極欣、癡類、癡生，總名無明。云何無明緣行？謂世尊說：苾芻當知！無明爲因，無明爲緣，故貪瞋癡起；此貪瞋癡性，是名無明緣行。復次，如世尊說：苾芻當知！無明爲前行，無明爲標幟，故起無量種惡不善法，謂無慙、無愧、等，由無慙、無愧、故，起諸邪見；由邪見故，起邪思惟；由邪思惟故，起邪語；由邪語故，起邪業；由邪業故，起邪命；由邪命故，起邪勤；由邪勤故，起邪念；由邪念故，起邪定；此邪見、邪思惟、邪語、邪業、邪命、邪勤、邪念、邪定，是名無明緣行。復次，如世尊說：苾芻當知！起無量種惡不善法，一切皆以無明爲根，無明爲集，是無明類，從無明生，墮無明趣者，不

如實知善、不善法，有罪、無罪法，應修、不應修法，下劣、勝妙法，黑、白法，有敵對法，緣生諸法；不如實知此諸法故，使起邪見、邪思惟，乃至邪念、邪定，是名、無明緣行。復次，瓮喻經中，佛作是說：無明爲緣，造福、非福，及不動行，云何福行？謂有漏善身業、語業、心、心所法，不相應行，如是諸行，長夜能招可愛、可樂、可欣、可意諸異熟果，此果名福，亦名福果，以是福業異熟果故，是名福行。云何非福行？謂諸不善身業、語業、心、心所法，不相應行，如是諸行，長夜能招不可愛、不可樂、不可欣、不可意諸異熟果，此果名非福，亦名非福果，是非福業異熟果故，是名非福行。云何不動行？謂四無色定，諸有漏善，是名不動行。云何無明爲緣，造非福行？謂有一類，由貪瞋癡纏縛心故，造身語意三種惡行，此三惡行，名非福行；由此因緣，身壞命終，墮於地獄，於彼復造非福行等，是名、無明爲緣造非福行。如說地獄、傍生、鬼界，應知亦爾。云何無明爲緣，造福行？謂有一類，於人趣樂，繫心惛求，彼作是念：願我當生人趣同分，與諸人衆，同受快樂，因此惛求，造能感人趣身語意妙行，此三妙行，名爲福行；由此因緣，身壞命終，生於人趣，與諸人衆，同受快樂，於彼復造諸福行等，是名、無明爲緣造福行。有不繫心惛求

人樂，但由無明蔽動心故，造身語意三種妙行，此三妙行，名爲福行；由此因緣，身壞命終，生於人趣，於彼復造諸福行等，是名、無明爲緣造福行。如說人趣，四大王衆天、三十三天、夜摩天、覩史多天、樂變化天，他化自在天，應知亦爾。復有一類，於梵衆天，繫心惛求，彼作是念：願我當生梵衆天衆同分中，因此惛求，勤修加行，離欲惡不善法，有尋有伺離生喜樂，初靜慮具足住，於此定中，諸身律儀、語律儀、命清淨，名爲福行；由此因緣，身壞命終，生梵衆天衆同分中，於彼復造諸福行等，是名、無明爲緣造福行。有不繫心惛求生彼，但由無明蔽動心故，勤脩加行，離欲惡不善法，有尋有伺離生喜樂，初靜慮具足住，於此定中，諸身律儀、語律儀、命清淨，名爲福行。由此因緣，身壞命終，生梵衆天衆同分中，於彼復造諸福行等，是名、無明爲緣造福行。如說梵衆天、梵輔天、大梵天、少光天、無量光天、極光淨天、少淨天、無量淨天、遍淨天、無雲天、福生天、廣果天，隨其所應，廣說亦爾。復有一類，於無想天，繫心惛求，彼作是念：願我當生無想天衆同分中，因此惛求，勤修加行，思惟諸想，是麤苦障，思惟無想，是靜妙離；由此思惟，能滅諸想，安住無想，彼諸想滅，住無想時，名無想定，入此定時，諸身律

儀、語律儀、命清淨、名爲福行；由此因緣，身壞命終，生無想天衆同分中，於彼亦能造少福行，是名無明爲緣造福行。有不繫心惛求生彼，但由無明蔽動心故，勤修加行，思惟諸想，是麤苦障，思惟無想，是靜妙離；由此思惟，能滅諸想，安住無想，彼諸想滅，住無想時，名無想定，入此定時，諸身律儀、語律儀、命清淨、名爲福行；由此因緣，身壞命終，生無想天衆同分中，於彼亦能造少福行，是名無明爲緣造福行。云何無明爲緣，造不動行？謂有一類，於空無邊處天，繫心惛求，彼作是念：願我當生空無邊處天衆同分中，因此惛求，勤修加行，超諸色想，滅有對想，不思惟種種想，入無邊空，空無邊處具足住，於此定中，諸思等思，現前等思，已思，當思，思性，思類，造心意業，名不動行；由此因緣，身壞命終，生空無邊處天衆同分中，於彼復能造不動行，是名無明爲緣，造不動行。有不繫心惛求生彼，但由無明蔽動心故，勤修加行，超諸色想，滅有對想，不思惟種種想，入無邊空，空無邊處具足住，於此定中，諸思等思，現前等思，已思，當思，思性，思類，造心意業，名不動行；由此因緣，身壞命終，生空無邊處天衆同分中，於彼復能造不動行，是名無明爲緣，造不動行。如說空無邊處，識無邊處，無所有處，

非想非非想處，應知亦爾。如是諸行，無明爲緣，無明爲依，無明爲建立，故起等起，生等生，聚集出現，故名無明緣行。

云何行緣識？謂有一類，貪、瞋、癡，俱生思爲緣故，起貪、瞋、癡，俱生諸識，是名行緣識。復有一類，無貪、無瞋、無癡，俱生思爲緣故，起無貪、無瞋、無癡，俱生諸識，是名行緣識。復次，眼及色爲緣，生眼識，此中眼是內有爲行，色爲外緣，生眼識，是名行緣識。乃至意及法爲緣，生意識，此中意是內有爲行，法爲外緣，生意識，是名行緣識。復次，登喻經中，佛作是說：造福、非福不動行已，有隨福、非福、不動識，云何造非福行已，有隨非福識？謂有一類，由貪、瞋、癡纏縛心故，造身語意三種惡行，此三惡行，名非福行；由此因緣，身壞命終，墮於地獄，於彼起識，是名造非福行已，有隨非福識。如說地獄、傍生、鬼界，應知亦爾。云何造福行已，有隨福識？謂有一類，於人趣樂，繫心惛求，彼作是念：願我當生人趣同分，與諸人衆同受快樂，因此惛求，造能感人趣身語意妙行，此三妙行，名爲福行；由此因緣，身壞命終，生於人趣，於彼起識，是名造福行已，有隨福識。有不繫心惛求人樂，但由無明蔽動心故，造身語意三種妙行，此三妙行，名爲福行；由

此因緣，身壞命終，生於人趣，於彼起識，是名造福行已，有隨福識。如說人趣，四大王衆天，乃至他化自在天，應知亦爾。復有一類，於梵衆天，繫心悌求，彼作是念：願我當生梵衆天衆同分中，因此悌求，勤修加行，離欲惡不善法，有尋有伺，離生喜樂，初靜慮具足住，於此定中，諸身律儀，語律儀，命清淨，名爲福行；由此因緣，身壞命終，生梵衆天衆同分中，於彼起識，是名造福行已，有隨福識。有不繫心悌求生彼，但由無明蔽動心故，勤修加行，離欲惡不善法，乃至命清淨，名爲福行；由此因緣，身壞命終，生梵衆天衆同分中，於彼起識，是名造福行已，有隨福識。如說梵衆天，梵輔天，乃至無想天，應知亦爾。云何造不動行已，有隨不動識？謂有一類，於空無邊處天，繫心悌求，彼作是念：願我當生空無邊處天衆同分中，因此欣求，勤修加行，超諸色想，滅有對想，不思惟種種想，入無邊空，空無邊處具足住，於此定中，諸思等思，現前等思，已思當思，思性思類，造心意業，名不動行；由此因緣，身壞命終，生空無邊處天衆同分中，於彼起識，是名造不動行已，有隨不動識。有不繫心悌求生彼，但由無明蔽動心故，勤修加行，超諸色想，乃至造心意業，名不動行；由此因緣，身壞命終，生空無邊處天

衆同分中，於彼起識，是名造不動行已，有隨不動識。如說空無邊處天，乃至非想非非想天，應知亦爾。如是諸識，行爲緣，行爲依，行爲建立，故起等起，生等生，聚集出現，故名行緣識。

云何識緣名色？謂有一類，貪瞋癡俱生識爲緣故，起貪瞋癡俱生身業、語業，名爲色；卽被所生受想行識，名爲名；是名識緣名色。復有一類，無貪、無瞋、無癡，俱生識爲緣故，起無貪、無瞋、無癡，俱生身業、語業，名爲色；卽彼所生受想行識，名爲名；是名識緣名色。復次，教誨那地迦經中，佛作是說：若那地迦所愛親友，變壞離散，便生愁歎苦憂擾惱，此愁俱生識爲緣故，起愁俱生身業、語業，名爲色；卽彼所生受想行識，名爲名；是名識緣名色。復次，教誨頗勒鞞那經中，佛作是說：頗勒鞞那識爲食故，後有生起，此識云何？謂健達縛最後心，心意識增長堅住，未斷、未遍知、未滅、未變吐，此識無間，於母胎中，與羯刺藍自體和合，名爲色；卽彼所生受想行識，名爲名；是名識緣名色。復次，教誨莎底經中，佛作是說：三事和合，入母胎藏，云何爲三？謂父母和合俱起染心，其母是時調適，及健達縛正現在前，如是三事和合，入母

胎藏，此中健達縛最後心意識，增長堅住，未斷，未遍知，未滅，未變吐，此識無間，入母胎藏，此所託胎，名爲色；卽彼所生受想行識，名爲名；是名識緣名色。復次，大因緣經中，尊者慶喜問佛：名色爲有緣不？佛言：有緣，此緣謂識。佛告慶喜：識若不入母胎藏者，名色得成羯刺藍不？阿難陀曰：不也，世尊！識若不入母胎藏者，名色得生此界中不？不也，世尊！識若初時已斷壞者，後時名色得增長不？不也，世尊！識若全無爲，可施設有名色不？不也，世尊！是故慶喜！一切名色，皆識爲緣。是名識緣名色。如是名色，識爲緣，識爲依，識爲建立，故起等起，生等生，聚集出現，故名識緣名色。

云何名色緣識？謂眼色爲緣生眼識，此中眼及色，名爲色；卽彼所生受想行識，名爲名；於中作意等，能助生眼識，是名名色緣識。乃至意法爲緣生意識，此中諸意識所了色，名爲色；卽彼所生受想行識，名爲名；於中作意等，能助生意識，是名名色緣識。復次，教誨頗勒鞞那經中，佛作是說：頗勒鞞那！識爲食故，後有生起，此識云何謂健達縛，廣說乃至與羯刺藍自體和合，此羯刺藍自體和合，名爲色；卽彼所生受想行識，名爲名；爾時非理作意俱生，名色爲緣，起俱生識，是名名色緣識。復次，教誨莎底

經中，佛作是說：三事和合，入母胎藏，廣說乃至此識無間，入母胎藏，此所託胎，名爲色；卽彼所生受想行識，名爲名；爾時非理作意俱生，名色爲緣，起俱生識，是名名色緣識。復有一類，由貪瞋癡纏縛心故，造身語意三種惡行，此中身語惡行，名爲色；意惡行，名爲名；由此惡行名色爲緣，身壞命終，墮於地獄，於彼起識，是名名色緣識。如說地獄、傍生、鬼界，應知亦爾。復有一類，於人趣樂，繫心悋求，因此悋求，造能感人趣身語意妙行，此中身語妙行，名爲色；意妙行，名爲名；由此妙行名色爲緣，身壞命終，生於人趣，於彼起識，是名名色緣識。有不繫心希求人樂，但由無明蔽動心故，造身語意三種妙行，此中身語妙行，名爲色；意妙行，名爲名；由此妙行名色爲緣，身壞命終，生於人趣，於彼起識，是名名色緣識。如說人趣，四大王衆天，乃至他化自在天，應知亦爾。復有一類，於梵衆天，繫心希求，因此希求，勤修加行，離欲惡不善法，乃至初靜慮具足住，於此定中，諸身律儀，語律儀，命清淨，名爲色；卽彼所生受想行識，名爲名；由此爲緣，身壞命終，生梵衆天衆同分中，於彼起識，是名名色緣識。如說梵衆天、梵輔天，乃至非想非非想處，隨其所應，當知亦爾。復次，大因緣經中，尊者慶喜問佛：

諸識爲有緣。不佛言：有緣，此謂名色。佛告慶喜：若無名色，諸識轉不。阿難陀曰：不也。世尊！若無名色爲所依止，後世所受生老死識，爲得生不？不也。世尊！若諸名色，都無所有，爲可施設，有諸識不？不也。世尊！是故慶喜！諸識皆以名色爲緣，是名、名色緣識。如是諸識，名色爲緣，名色爲依，名色爲建立，故起等起，生等生，聚集出現，故名、名色緣識。

云何名色緣六處？謂有一類，爲寒所逼，希求於暖，得好暖故，便起身中暖俱大種，此中若暖，若暖俱大種，名爲色；卽彼所生受想行識，名爲名；由此名色，眼耳鼻舌身及意根，皆得增長，是名、名色緣六處。爲熱所逼，希求於冷，應知亦爾。復有一類，爲飢所逼，希求於食，得好食故，便起身中食俱大種，此中若食，若食俱大種，名爲色；卽彼所生受想行識，名爲名；由此名色，六根增長，是名、名色緣六處。復有一類，爲渴所逼，希求於飲，得好飲故，便起身中飲俱大種，此中若飲，若飲俱大種，名爲色；卽彼所生受想行識，名爲名；由此名色，六根增長，是名、名色緣六處。復有一類，勞倦所逼，希求止息，按摩睡眠，由遂意故，便起身中彼俱大種，此中若按摩等，若彼俱大種，名爲色；卽

彼所生受想行識，名爲名；由此名色，六根增上，是名、名色緣六處。復有一類，於盛熱時，熱渴所逼，入清涼池，恣意飲浴，便起身中彼俱大種，此中若清冷水，若彼俱大種，名爲色；卽彼所生受想行識，名爲名；由此名色，六根增長，是名、名色緣六處。復次，教誨頗勒鞞那經中，佛作是說：頗勒鞞那！識爲食故，後有生起，此識云何？謂健達縛，廣說乃至與羯刺藍自體和合，此羯刺藍自體和合，名爲色；卽彼所生受想行識，名爲名；爾時非理作意，俱生名色爲緣，母胎藏中，六根生起，是名、名色緣六處。復次，教誨莎底經中，佛作是說：三事和合，入母胎藏，廣說乃至，此識無間，入母胎藏，此所託胎，名爲色；卽彼所生受想行識，名爲名；爾時非理作意，俱生名色爲緣，母胎藏中，六根生起，是名、名色緣六處。復有一類，由貪瞋癡纏縛心故，造身語意三種惡行，此中身語惡行，名爲色；意惡行，名爲名；由此惡行，名色爲緣，身壞命終，墮於地獄，六根生起，是名、名色緣六處。如說地獄、傍生、鬼界，應知亦爾。復有一類，於人趣樂，繫心希求，因此希求，造能感人趣身語意妙行，此中身語妙行，名爲色；意妙行，名爲名；由此妙行，名色爲緣，身壞命終，生於人趣，六根生起，是名、名色緣六處。如說人趣，四大王衆天，

乃至他化自在天，應知亦爾。復有一類，於梵衆天，繫心希求，因此希求，勤修加行，離欲惡不善法，乃至初靜慮具足住，於此定中，諸身律儀、語律儀、命清淨，名爲色；卽彼所生受想行識，名爲名；由此爲緣，身壞命終，生梵衆天衆同分中，六根生起，是名、名色緣六處。如說梵衆天，梵輔天，乃至非想非非想處天，隨其所應，當知亦爾。是名、名色緣六處。如是六處，名色爲緣，名色爲依，名色爲建立，故起等起，生等生，聚集出現，故名、名色緣六處。

說一切有部法蘊足論卷第十一